

Аллагъди къабул авурай!

Гъурметлу районэгълиар! Къурбанд сувар мусурманар патал виридалайни багъа ва важиблу я. И суварилай вилик чакай бязибур Меккедиз Гъяждал физва. Аллагъдиз муьтлуьгъвал, инсанрин рагъимлувал, мергъяматлувал, сабурлувал, кевевайдан гъил къун лишанламишзавай и суварин къилин шартI - адет гъайван туклуна къурбанд садакъа гун я. Ада чаз кесибрин, багърийрин патяхъай къайгъударвал авуниз эверзава. Аллагъдихъ элкъвена диндин шартIар киле тухуналди, кевевайбурун гъил къуналди, мергъяматлувилин суваб кралди чна чун гунагърикай михъзава. Къуй куь дуьаярни садакъаяр Аллагъди къабул авурай! Чна квез чандин сагъвал, кIвалера гъурмет, берекат артух хъун, мусурман диндал мягъкем хъун тIалабзава.

«Ахцегъ район» МР-дин къил А-К.Н.ПАЛЧАЕВ

РД-дин АХЦЕГЪ РАЙОНДИН ОБЩЕСТВЕННО-ПОЛИТИЧЕСКИЙ ГАЗЕТ



ЩИШИ ДУЬНЯ

Ахтынская районная общественно-политическая газета

“НОВЫЙ МИР”

1928-йисалай акъатзава. №23 (8991) арбе, 4-июнь, 2025-йис.

Къимет 10 манат 12+

Гележег фикирда аваз...

Алай йисан 29-майдиз чи республикадин Къил Сергей Алимович Меликов Халкъдин Собраниедин вилик гъар йисан Чар (Послание) гъаз экъечIна. Ада авай гъалариз маналу жуьреда анализ гана, мукъвал тир гележег патал Дагъустан вилик финин дибдин рекъер тайинарана.



Чарче республикадин гъукумри дагъустанвийрин тIал алай месэлайриз фикир гунин, районрин ва шегъеррин авадавал хъсанарунин, инфраструктура вилик тухунин, яшайишдин кар алай месэлаяр гъялунин важиблувал къетIендаказ къейднава. Сергей Алимовича женгинин махсус серенжемдин иштиракчийриз ва абурун хизанриз куьмекар гунин месэла иллаки къетIен дикъетдин юкъва хвена.

Ашкара я хьи, Дагъустан Республикадин Къилин Чарче къалурнавай везифаяр къилиз акъудуни республикадал идара авунин цийи ери, къе общества авай игътияжриз энгелвал авачир жавабар гун, гъакIни республикадин шегъеррин ва хуьерин агъалийрихъ галаз гъамишан алакъа истемишда. РД-дин Къили гъахълудаказ къейд авурвал, «хейлин месэлаяр энгелвал авачиз къилиз акъудиз жедач, амма гъар са арзадив рикI гъаз эгечIун, гъукумрин вири дережайрин гъерекатар са мураддихъ рекъе тун лап важиблу я. Гъавилай агъалийрихъ галаз сих алакъаяр хуьнин гъавурда акъадай, ачух, нетижалу ва дурумлу механизм арадал гъана кIанда.

Экономикадин ва яшайишдин, политикадин хилера къабулзавай законар гъазурзавайла, региондиз желбзавай инвестицияр артухарунихъ, гъвечIи ва юкъван бизнестин тереф хуьнихъ, кIвалахдай цийи чкаяр яратмишунихъ, агъалийрин уьмуьрдин ери хъсанарунихъ ва чеб Чарче къарагъарнавай месэлаяр закондалди таъминарунихъ къетIен метлеб ава. Чарче гъам агалкъунар ва гъамни республикади гъялна кIанзавай месэлаяр ачухарнава. Абурни къе тIимил авач. Республикадин Къилин Чарче къалурнавай вири везифаяр жезмай къван ерилуудаказ, менфатлуудаказ ва вахтунда къилиз акъудун чи къенин къилин мурад я.

Мария Захарова Дагъустандин лайихлувилерикай рахана

Махачкъалада, дуствилин КIвалин май-дандал, Россиядин МИД-дин информация-дин а печатдин Депортментдин директор Мария Захаровади къецепатан политикадин йикъан месэлайрай чкадал киле феи брифинг киле тухузвай вахтунда региондин яшайишдинни экономикадин ва культу-радинни тарихдин къиметлувал къейдна. Къилди къачуртIа, ада лагъана хьи, Дагъустан виче эсирралди гъар жуьре халкъар ислягъвилелди яшамаш жезвай, санал имтигъанрай экъечIай, четинвилер эхай надир чка я. Чи республикади и руьгъдин ивиррар вилин нини хъиз хуьзва. Абур ина виринара ава: къванце, архитектурада, тIебиатда.

«Дагъустан чи уьлкведин рикIел аламукъдай, вичиз хас тир лишанар авай ва фикир желбдай регионрикай сад я. Россиядин йигин еришралди вилик физвай субъект тир ина 30-далай гъаф дибдин миллетар, чпин чIалар, диалектар ава, 60-далай гъаф халкъар ислягъвилелди ва дуствилелди яшамаш

жезва. Къейд ийин, гъар са халкъди вичин адетар хвенва. Им Россиядин виридалайни Къиблепатан регион я. Халкъарин арадин гъуьлуьн рекъер авай ада геостратегиядин рекъай хийирлу чка къунва. Дагъустан халкъарин арадин «Север-Юг» транспортдин коридордин логистикадин инфраструктурада важиблу звено я» – лагъана Мария Захаровади ва регионда маса уьлквейрихъ галаз санал кIвалахуникай суьгъбетна.

Алай вахтунда Дагъустанда 62-далай гъаф уьлквейрихъ галаз алакъаяр хуьзва. Республикадин экономикадин асул хилер тир хуьруьн майишат, гъялдай промышленность, машиностроение, недай-хъвадай суьрсетдин хел йигин еришралди вилик физва. Ина индустриядин ирид парк кардик ква. 2024-йисуз Дагъустандин къецепатан алишверишдин умуми аборотди 314,28 миллион доллар тешкилна. Республикадиз виридалайни гъаф товарар Ирандай, КИтайдай, Белоруссиядай, СНГ-дин, ЕС-дин,



Къиблединни РагъэкъечIдай патан Азиядин уьлквейрихъ галаз авай алакъайриз къетIен фикир гузва. Гъелбетда чна экономикадин рекъай вилик финин цийи терефар жагъурунин рекъай региондин руководствонин алакъайрин тереф вири серенжемралди хуьз жеда,– къейдна Мария Захаровади.

Аялрин Югъ гурлу сувариз элкъвена



Лумуна АГЪМЕДОВА

Гъар йисан 1-июндиз дуьньядин гъаф уьлквейра, гъа гъисабдай яз Россиядан, Дагъустандани аялар хуьдай Международный йикъан сергъятра аваз абур машгъулардай гъар жуьре серенжемар киле тухун хъсан адетдиз элкъвена. Цийи и лишанлу юкъуз чи республикада гъаф къадар аялрин ишти-раквал аваз хейлин мярекатар, концертар, фестивалар тешкилна.

Къилди къачуртIа, цIи аялар хуьнин Международный йикъан сувариз талукъ шад-вилин чIехи мярекат Ахцегъа СССР-дин Игит летчик Валентин Эмирович ТIварунихъ галай паркда киле фена. Ахцегъ райадми-нистрациядин къилин къарардал асаслу яз, ам райондин культурадин ва образованидин Управленийрин коллективри тешкилна киле тухвана. Мярекатда райондин школайринни аялрин бахчайрин, алава образованидин ида-райрин (музыкадин, художественный, искус-ствойрин школайрин, аялрин яратмишунрин КIвалин, жегъил натуралистрин станциядин,

республикадин аялрин «Ахты» тIвар алай са-наторийдин) коллективри ва гатун каникулриз чпин багърийрин патав хтанвай мугъман аялри тербиячир ва диде-бубайрин галаз иштиракна.

Малум тирвал, и югъ общества аялрин ихтиярар хуьн патал арадал атанай. Дуьньядин къвед лагъай дяведин ва ададай гуьгъуьнин йисарани хейлин аялар гъаф къазайрик, зу-лум-зиллетдик акатна. Дяведин цIаяр алатай-ла, адан ялаври агажарнавай уьлквейри чеб гуьнгуьна хтун патал гъаф зегъметар чIугъваз, гележегдикай фикирар ийиз эгечIна. Аялар галачиз гъихътин гележегдикай рахаз жеда къван, гъа икI и йикъан метлебувални артух хъана. Ам гатун сад лагъай юкъуз вучиз киле тухузватIа тестикъарзавай делилар авач, им акъван важиблу карни туш. Важиблуди аялрин бахтлу гележег патал чна вуч ийизватIа гъам я.

Къейд авун лазим я хьи, Ахцегъ раймуни-ципалитетдин къил Абдул-Керим Палчаеван тапшуругъдалди суварин юкъуз Украинада киле физвай женгинин махсус серенжемад иштиракзавай ксарин, гъакIни еке хизанрай тир, яшайишдинни реабилитациядин Центрда

авай аялриз артух фикир гун къетIнавай.

Аялрин, абурун диде-бубайрин ва муал-лимрин вилик тебрикдин гаф рахуналди, сувар Ахцегъ район МР-дин къилин заместитель Роберт Гъамзаева ачухна. Тамадавал райондин культурадин Управлениедин начальникдин заместитель Сулейман Сулейманова авуна. Нубат-нубатдалди сегънедал экъечIиз, аял-рин гъевескар коллективри ватанпересвилин манийралдини зиринг къуьлералди кIватI хъанвайбурун гуьгъуьлар шадарна. Концертдин нумрайрин арада, тамададин теклифдалди, аялрихъ галаз итижлу конкурсарни къугъунар тешкилна. Абурун иштиракчийриз гъвечIи савкъатар гуналди аялрин рикIер шадарна. Спортдал рикI алайбурувай дарт (лишанар къун) къугъунай, мини-футболдай, теннис къугъунай чпин алакъунар ва устадвал къалу-риз жезвай. КIватI хъанвайбур патал халкъдин сеняткарвилерай къалурай мастер классар, шикилар чIугунай конкурсарни итижлуудаказ, къилинди, аялрин рикIел яргъалди аламукъ-дайвал киле фена.

ЯШАЙИШДИН ПРОЕКТАР – КАРДИК

Къулай рекьерни, хъвадай михьи ятарни жеда!

Дашдемир ШЕРИФАЛИЕВ

Хуьруьн чкада жемят хатасуз, ерилу рекьералди таъминарун – им уьлкведа РФ-дин Президент Владимир Путинан Къарардалди кыле тухузвай милли проектирай сад я. Ам регионрин ва районрин регъберрин гуьзчи-вилик кваз чкайрални агалкъунралди бажармишзава. Развилелди къейдин, Ахцегъа къилинбур тир Ленинан ва Арсен Байрамован тIварунихъ галай кьве куьче капиталнидаказ ремонт ийиз ва цин цийи трубопровод тухуз эгечIунални районэгълийри шадвалзава, сагърай лугъузва райондинни республикадин регъберриз.



Райондин руководстводин теклифдалди, заказчик РД-дин Минтранс яз, ремонтрин кIвалахар вичи госконтракт (№06/25-РЕМ/Р) къачунвай «Елена» ООО карханади «РД-дин хуьруьн территорияр комплекснидаказ вилик тухун» тIвар алай программадай кыле тухузва. Проектда къалурнавай кьве куьчедин умуми яргивал – 3,9 километр, кьимет – 69 610 776 манат пул я.

Проектдик, Ленинан ва Байрамован куьчяр гегъеншарна асфальтламишдалди вилик, рехъ тирвал 1,5 метрдин гъяркуь, къулай тротуар тухуьрун, чилик (исятда ишлемишзавай куьгънедини туна) хъвадай цин цийи трубопровод кутун ва дигадай, гъаI ахвахъдай ятарин хулар дуьзмишун ква. Алай вахтунда Ленинан куьчеда гъазурлухвилини кIвалахар саки бегъемарнава, ахпа Байрамован куьчедив (Джиорсанни Дебернардинин муькъвелей «Самур» вацун муькъвел кван) эгечIда. Ремонтрин кIвалахар тамамвилелди гъилевай йисан сентябрдиз куьтягъна, объект ишлемишиз вахкуда.

Къейдин, инал тIварар къунвай куьчяр аваданламишунихъ галаз санал, къилинди, районда хъвадай цин месэлни гъялзава. Саки вири Дагъ-устанда хъиз, хъвадай михьи цин месэла Ахцегъ райондани, иллаки райцентрда хцидаказ акъвазнава. Ахцегъиз чIехи кьве трубопровод гъанватIани («Мацар-дере – Ахцегъ», ва Рутул райондай къил къачунвай «Лекъе-дере – Ахцегъ»), районэгълийри цин къитвал гиссзава ва еридин жигъетдайни а ятари СанПиН-дин истемишунриз жаваб гузвач.

Районда хъвадай цин месэла лазим тирвал гъялна къакъудунин мураддалди алай вахтунда Республикадин инвестицийрин программадай «Лекъе-дере – Ахцегъ» цин провод ремонт хъйизва ва «Лалаан-дере – Ахцегъ» цин трубопровод гъизва (диаметр 300 мм). Идан гъакъиндай гъеле 2023-йисуз Ахцегъ райондин администрацияди, финансрин бюджетдинбур тушир пулдин такъатар желбуналди, ООО «Капитал» карханадихъ галаз кIвалахдин икьрар кутIунва. Алай вахтунда и проект госэкспертизадай акъатнава ва подрядчик (руководитель Гъамзат Мегъамедов) эцигунрин кIвалахдив активнидаказ эгечIнава: трубопровод тухудай, цин гъамбарханайрин (резервуарар) ва яд михъдай имаратрин майданар тухуьруьнзава.

Цин трубопроводдин яргивал 35,614 километр я ва проектдин умуми кьиметди сметадин документациядай 344 175 310 манат тешкилзава. И проект кардик акатайла, ада 16 агъзур агъали яшамш жезвай Ахцегъар ва Самур дередин 5 хуьр – Хуьруьгар, Цуругъар, КъакIар, Луткунар ва Калукар хъвадай михьи целди таъминарда.

– Ахцегъ ва Рутул районрин къилер меслят хъанвайвал, Лалаан дереда цин чешмедал чна гъанай кьве райондивайни яд къачуз жеривал девирдин истемишунрив къадай къилин имаратар эцигда, – лугъузва проектдин заказчик, «Ахцегъ район» МР-да МБУ УСЕЗ идарадин начальник Алихан Ибрагъимова. – Яд къадай ва михъдай имаратрин санитарный зона (анал токдин трансформа-

тордин подстанция ва герек амай шейэр жеда) Цуругъа «Кал» участкада тухуьруьнзава. Цин къилин чешмедилай 115 метрдин агъада авай анал гъар сада 550 кубометр яд къадай ракъунни бетондин мягкем кьве резервуар жеда. Анай Ахцегъиз, цин разводящий къурулушдив кван дуьз 28 километр ава ва яд къиллай къилиз вич-вичиз авахъна кьезва. Цин дебитди лагъайтIа, са сятда 171, яни суткада 4104 кубометр тешкилзава.



– Алихан стха, фикир гайила, гъакъикъатдани, им эхиримжи вахтунда Ахцегъ районда кыле тухузвай халкъдин яшайишдин ва сагъламвилини мана-метлебдин лап важиблу проект я. ГъвечIидини туш: кьимет 344 миллион манатдилай гъаф пулдин такъатар! Икъван пул мус ишлемишиз, яни проект мус бегъемна кардик кутаз жеда?

– Проект пуд паюна, яни пуд йисуз кыле тухуда. ЦИ 13 километр трубопровод ва Цуругъа цин гъамбарханаяр, къведай йисуз яд михъдай имаратни Ахцегърив къведалди трубопровод тухун ва 2027-йисуз Лалаан дереда цин чешмедин къилин имарат тухуьруьн планламишнава. КIвалахарин гъа и график фикирдаваз, яни пака кIвалахар энгел тахъун ва райцентрдин куьчейра твазвай асфальт кукIвар тахвун игътиягъ яз, исятда ана лазим къайдада цин трубайрин цийи, дурумлу къурулуш тухуьруьнзава...

Развилелди къейдин, гъам райцентрда рекъер аваданламишунин ва гъам вичикай ихтилат физвай хъвадай цин трубопровод чIугунин вири кIвалахар Ахцегъ райондин руководстводин, къилди къачуртIа, адан регъбер Абдул-Керим Палчаеван хуси гуьзчивилик ква. Эцигунрин кIвалахра мумкин тир вири энгелвилер ада вахтунда алудзава. И крар акваз, «Сагърай» лугъуз, алхишзава жемятди.

ЖУРНАЛИСТДИН КЪЕЙДЕР

Вашингтондикай Москвадиз дуст жедач

Нариман ГЪАЖИЕВ журналист, зегъметдин ветеран

Пуд йисни пуд варз хъхъанва Россияди гегъеншдиз малумарай женгинин махсус операция (СВО) кыле физ, я гъеле адан эхирни акъазвач. Са тIмил вахтарилай ам гъа Ватандин ЧIехи дяведин дережадив ахгакъзава – гъам вахтунив гекъигайла, гъам масштабриз (гегъеншвилериз) килигайла, гъамни иштиракчийриз вил вегъейла, гъа са «актерар» я: фашистар, нацистар, бандеровчийр, «галичина», коллаборационистар ва гъаI чпин хушунат атанвай гъевеслу бандитар-наемникар, пулдихъ дяве ийизвай армейский дестеяр – вири Европа, саки планетадин вири Запад, Азиядайни бязи къучийар кахкахъиз.

Им гъич махсус операциядин гуьнгуьна амач. Акъазва – СВО-дин статус дегиш хъанва. Махсус операцияр икъван яргъарал физвайди туш, я иллюионал (къве патайни) къурбандарни жезвайди туш, я махсус операцийра 55 уьлквейрин армиярни яракъар кардик садрани хъанвайди туш. Им НАТО-динни Россиядин арада ачух, еке масштабдин дяведиз элкъенва.

Дяве физвай жуьредиз килигайла къилиз фикирар кьезва. Чна дяведикай сводкайриз (малуматриз) яб гузва, репортажар акъван сад - садаз ухшамшбур я хъи, гъи вакъиа, ягъунар гъина ва мус хъайибур ятIа лугъунихъ са метлебни амач. Дяве Донбассдилай башламишнава, къени, пуд йис алатнаватIани, женгер гъа Донбассда физма, гъеле и республика миллетчийрикай азад хъанвач. Гегъеншдиз малумарна шад гъалара Россиядик кухтунвай кьве областдин (Херсон, Запорожье) сергъятдин чIехи пай гъабурун меркезарни кваз Украрейхдин гъиле ама. Азад авунвай хуьрер, поселокар, шегъерар, гъа сифтедилай хъиз, миллетчийрин гуьллейрик кума, телефилерни пучвилер давам жезма.

СВО башламишайла, адан мурад малумарнай: Донбассдин урус чIалал рахазвай инсанриз куьмекун, абур Украина хътин къуншидикай яргъа ва азад авун, Украинада денацификация тухун (миллетчивал тергун), са шартIарайни Украинадиз НАТО-диз фидай рехъ тагун. Къвалав миллетчийрни, бандеровчийр гумай къван Россиядиз секинвал тежедайди чи руководстводиз чизвай. Гила денацификациядикай ихтилатар ван хъи-жезмач, дяве «вяло-текущий» (кагъул), позиционный, сада-садавай даяхдин пункт къакъудзавай ва я блиндаж яна тергзавай дяведин гъерекатрикай ибарат хъанва. Вад кIвал авай хуьр ва я гъвечIи кIланвай поселок азад

хъувурла еке агалкъун яз малумарзавай чкадал атанва. Фикир кьезва: гъикъван еке мумкинвилер, дяведин такъатар авай Россия геж хъана, ада вахт гъавайда ракъурайди хъиз акъазва. Генерал лейтенант Евгений Бушинскийди ва гъахътин маса пешекарри теклифайвал, еришар яваш тавуна, вири гуьлу такъатар кардик кутуна дяве Украинадин Западный сергъятра, Закарпатда акъалтIарнайтIа, кье алай гъал тахъун лазим тир, гъалибвални арадал жедай.

Дяведа душмандин меркез къачун тавунмаз ам куьтягъ хъуникай, гъалибвал къачуникай ихтилатар жезвайди туш. И кар фадлай къатIай Зеленскийдин вич вичих инанмишвал артух жезва, адаз акуна – Россиядихъ вичиз еке зиянар гуниг фикир авачирди. Ида адан руьгъ мягкемарна, Западный футфачиярни пара хъайила, гъабурун яракъарни амай вири куьмекар кIватIна, чаз хъсан «тарс» гана - сиви чуькьрни тавуна Россиядин Курский областдиз гъахъна региондин еке са пай оккупацияда твазва. Алапатдин кар: икъван еке куватар кIватIна иниз гъахъун. Гъелбетда, вири Европада адаз куьмекнава. Абур бес садазни акуначи? Разведка гъина къанвайтIа?! Еке фортификационный гъазурвилер - бетонламишнавай блиндажар, километрийар траншеяр, мягкем даяхдин пунктар ибур мус, гъикI гъазуриз алакъна?

Ирид вацра абур ина авунвай къван къелетар, ганвай къван зиянар, телефнавай къван инсанар вирибуруз малум я. Къе абур инай чухкурнава, амма дяве куьтягъ хъанвач, я адан эхирни къатIуз жезвач, ам квел ва гъикI куьтягъ хъун лазим ятIа садазни чизвач. Меслятарни, рекъер къалурдайбурни авачиз туш. Ина къил квадар тавун, гъалатIриз рехъ тагун чарасуз я. Им Россиядал илитIнавай адан вичин дяве я, адаз къван ам фад ва гъахълувилелди куьтягъ хъун садазни герек туш.

Акъазвайвал, парабуру, гъа жергедай Россияди вичини Америкадин патай куьмекдик, меслятрик умудар кутазава. Еке гъалатI я. Дяве эвелимжи гъа США-ди Европани галаз вичи каватънавайди я. Къе Европа, гъадаз далу янавай Украина дяве акъазаруниз акси я. Абур Россиядал гъалибвал къачудай дяве давамариз гъазур я. И кар абур ачухдиз гъамиша тикрарзава, куьмекар гунни зайифарзавач. Америкадик умуд кутаз кIанзавайбуруз тикрариз кIанзава: США-дикай Россиядиз са вядедани я куьмекчи, я дуст жедайди туш. Абур даимлух, гъа США вич амай къван стратегический душманар, садаздаз (аксибур) я.

Бязибур США-дин президент Д.Трампа ритори-

кади (рахунри, хиве къунри) «сустарнава». Ада вичи и дяве куьтягъарда лугъудай гафар гъаф тикрарзава. Са къуватни, я нетижани а гафарихъ авайди туш. Трамп шоумен, торгаш (алверчи) я. Ам вичин имидждиз (тIварцIиз) къуллугъзавай лидер я, ада гъар са камуна, вичин гъерекатда чпиз хийир жагъурзава. Трамп саксонек я, саксонрин генетический кода руссофобия, Россиядиз сергъятсуз адават ава. Ада эхиримжи вахтара Россиядин адресдиз лагъанвай ва я лугъузвай са тIмил хъуьтуларнавай гафари (Россия чIехи держава я, ада Наполеонал, Гитлерал гъалибвал къачунва ва масабур) садни ягъалмиш тавун лазим я. Вич дяве фад куьтягъдай чалишмишвилера аваз къалурзаватIани, ам властдиз хтайдалай къулухъ Украинадиз яракъар ракъурун ва амай вири жуьредин куьмекар гун я акъазарнавач, я тIмиларнавач. Адан риторикани (рахунар), хиве къунар дегиш туш, гъа вичиз хасбур я. Ада Россиядиз буйругъар анихъ акъазарай, къурхуарни гузва, санкцияр мадни артухардай малуматар ракъурзава. Адаз тарих хъсан чидач, ам савадсуз я лугъуз кIанзавач (ихътин лишанар аватIани), амма ада Дуьньядин кьве дяведа, Ватандин ЧIехи дяведани фашизм тергна гъалибвал къачурди США я лугъуз гъамиша тестикъарзава. Ам гъа вири Западни галаз хаталу я. И кар гъамиша рикIел хъана кIанда.

Гъелбетда, США-дин къаншардиз кьезвай лишанар аваз акурла, абур инкар авун герек туш. Къилинди, ягъалмиш тахъун,абурун хиве къунар къалпбур тирди рикIел хуьн, абурув алчуарар ийиз вугун тавун – и карда абурухъ еке тежриба ава – важиблу я. Къалхара жедайдалай са гъихътин хъайитIани алакъайра, меслятра хъун хъсан я. Амма гъар декъикъада мензил хуьн, иллаки Америкадихъ галаз игътиягълувал квадар тавун важиблу я.

СВО давам жезва, гуьзетзавайвал, фронтдай хкизвай гробарни (къулар) тIмил туш. Гъар гъикI ятIани дяве куьтягъарна кIанда – я душман тергна, я акъазарнавач рекъералди. Эхиримжи вахтара перемирияр (ягъунар вахтуналди акъазарун), переговорар (меслятар) лугъудай ихтилатар гъаф хъанва, арадал са затIни кьезвач, я къведай бинени авач. РикIел кьезва: СВО эгечIдайла – дяве гъалибвилел куьтягъун, Донбасс хунтадикай къу-тармишун, денацификация, Украина са вахтундани, са жуьредани НАТО-да тахъун, перемирияр, переговорар са жуьрединбурни тахъун малумарнай. Украинадихъ галаз перемирияр эсиллагъ герек авач, я мумкинни туш. Са «Минскдин» переговорар Россиядиз акуна – Запад кылеваз, адан куьмекдал Украина яракъламиш авуна Россиядихъ галаз дяве авуниз гъазурна. СВО башламишайла, Россия и кардин гъавурда акъуна, анжах геж хъанвай, галтугай кар хъана.

(КъатI ама)

Протокол публичных слушаний

по проекту генерального плана и правил землепользования и застройки СП «сельсовет Ахтынский»

1. Общие сведения о проекте, представленном на публичные слушания:

Внесение изменений в генеральный план СП «сельсовет Ахтынский» проводится в соответствии с договором 1 от 03 марта 2025 года, ООО НПИ ПП «Меридиан».

Генеральный план действует на территории сельского поселения «сельсовет Ахтынский» в составе сел Ахты, Курукал, Хкем, Гдынк в пределах границ поселений.

2. Уполномоченный орган: Администрация МР «Ахтынский район».

3. Сроки проведения публичных слушаний: с 21 апреля 2025 года до 23 мая 2025 года.

4. Формы оповещения о начале публичных слушаний: решение о назначении публичных слушаний принято главой муниципального района «Ахтынский район» в форме постановления, которое размещено на официальном сайте МР «Ахтынский район» и в районной газете «Новый Мир» (выпуск №18 от 30 апреля 2025 года.)

Постановлением Главы МР «Ахтынский район» утвержден состав комиссии:

Председатель комиссии – заместитель главы МР «Ахтынский район» Ахмедова Ф.А.

Секретарь комиссии – юрист МБУ УСЕС Гаджиев Э.А.

5. Сведения о проведении экспозиции по материалам: Экспозиция проекта проведена в здании администрации сельского поселения, на официальном сайте сельского поселения «сельсовет Ахтынский», администрации МР «Ахтынский район» в течение всего периода проведения публичных слушаний.

6. Сведения о проведении собрания участников публичных слушаний - в администрации сельского поселения «сельсовет Ахтынский» 26 мая 2025 года в 10 ч 00 минут.

7. Предложения и замечания участников публичных слушаний:

В ходе слушаний участниками были озвучены изменения планируемые по внесению изменений в генеральный план и ПЗЗ СП «сельсовет Ахтынский»:

Заместитель Главы МР «Ахтынский район» обозначила, что основной причиной внесения изменений в Генплан СП «сельсовет Ахтынский» является проектирование объекта «Стро-

ительство общеобразовательной школы на 400 ученических мест с интернатом на 100 мест в с.Ахты (кадастровый номер 05:22:000029:698).

Также в ходе внесения изменений главой СП «сельсовет Ахтынский» разработчику были представлены изменения, которые должны быть внесены в генплан и правила землепользования и застройки:

Это изменения по землям сельскохозяйственного назначения (05:22:000029:718, 05:22:000029:588), земельные участки с кадастровыми номерами 05:22:000013:97, 05:22:000001:3681, 05:22:000029:786 внести в границы населенных пунктов, в правилах землепользования и застройки внесение в основной вид разрешенного использования в жилой зоне: «сельхозиспользование, предпринимательство, религиозное использование, здравоохранение, энергетика, производственная деятельность, связь, туристическое обслуживание.

Предложений и замечаний в ходе публичных слушаний по вышеуказанным пунктам не поступило. На поступившие в ходе слушаний вопросы были даны ответы и пояснения.

Также 21 мая 2025 года за №11-08.2-8985/25 было получено сводное заключение Правительства Республики Дагестан о согласовании проекта генерального плана сельского поселения СП «сельсовет Ахтынский».

Результатами публичных слушаний является решение:

1. Признать публичные слушания по проекту Генерального плана и ПЗЗ сельского поселения «сельсовет Ахтынский» состоявшимися.

2. Одобрить проект Генерального плана и ПЗЗ сельского поселения «сельсовет Ахтынский» с учетом поступивших предложений.

3. Протокол публичных слушаний по рассмотрению проекта Генерального плана и ПЗЗ сельского поселения «сельсовет Ахтынский» опубликовать в районной газете «Новый Мир» и на официальных сайтах МР «Ахтынский район» и СП «сельсовет Ахтынский».

Председатель комиссии
Ф.А. АХМЕДОВА

Секретарь комиссии
Э.А. ГАДЖИЕВ

Образованиеда – рекъемрин къурулуш!



И мукъвара Нижний Новгород шегъерда кыле феи «Россиядин рекъемрин индустрия» тIвар алай конференцияда РД-дин минцифрадин кыл Юрий Гьамзатова ва корпоративный бизнесдин рекъия МТС-дин вице-президент Олег Алдошина Дагъустандин школайра ИТ-инфраструктура тешкил авунин рекъий проект уьмуьрдиз кечирмишиз эгечIнавайдакай лагъана. Адан умуми кыметди 1,4 млрд манат тешкилда. И проектдин асул кьетIенвилерикай яз региондин образование гудай идарайра рекъемрин къурулуш, гъатта къакъан дагълух районрани, хатасузвили алай аямдин къу-

рулуш арадал гъун я. Къейднавай проект кардик кутадайла анжах Россияда гъасилнавай тадаракар ишлемишна.

И проектдин сергъятра аваз «Образование гудай рекъемрин майдан» программада республикадин вири 1380 школада, хуьрун чкайрани, гъакIни Махачкъала, Къизилорт ва Дербент шегъерра алай йисан эхирдалди WiFi-дин зонаяр тешкилда. Ида интернетдин умуми кIвалах ва государстводинни коммерциядин информациядин къурулушриз хатасуздаказ гъахъдай мумкинвал гуда. И проектди аялриз чирвилер гуни карда рекъемрин алай аямдин технологияр ишлемишдай мумкинвал гуда ва Дагъустандин школьникар патал абур республикадин гъи чкада яшамаш жезватIа, гъадалай аслу тушиз ерилу чирвилер къачудай сад хътин шартIар яратмишда.

Сергъятчийрин югъ тебрикна



Алай йисан 29-майдиз Ахцегърин погранотрядда сергъятчийрин Югъ шад гъалара къейдна. Адаз талукъарнавай суварин серенжемда Ахцегъ райондин кыл Абдул-Керим Палчаева иштиракна. Ада муниципалитетдин агъалийрин ва кылди вичин тIварунихъай госсергъят хуьзвай аскерриз пешекарвили сувар мубаракна, агъалийрин ислъагъ уьмуьрдин къаравулда акъвазнавай абуруз аскервили регъятди тушир зегъметдай чухсагъул малумарна, абурухъ чандин сагъвал, саламатвили

къуллугъ, шадвал ва аскеррин мукъва-къилийрихъни багърийрихъ вири рекъерай хъсанвилер хъун вичин мурат тирди лагъана.

Ахцегърин погранотряддин командирди къуллугъда тафаватлу жезвай аскерив грамотаяр ва Чухсагъулилин чарар вахкана. Шадвили митинг концертдал бегъем хъана. Райондин культурадин управленидин къуллугъчийр тир Таира Муспагъовади ва Эмирсултан Бегеева суварин гъуьрметдай сергъятчийриз чпин виридалайни хъсан манияр тамамарна.

Межрайонной прокуратурой поддержано государственное обвинение



В июне текущего года межрайонной прокуратурой в Ахтынский районный суд направлено уголовное дело по обвинению гражданина Г. в совершении преступления, предусмотренного ч. 1 ст. 157 УК РФ. ТПо версии следствия Г., зная о наличии вступившего

в законную силу решения суда о взыскании с него алиментов на содержание несовершеннолетних детей и возбуждении исполнительного производства, он алименты согласно решению суда не выплачивал.

Ранее Постановлением мирового судьи Г. был привлечен к административному наказанию по ст. 4.6 КоАП РФ в виде обяза-

тельных работ сроком на 20 часов. Однако Г. должных выводов для себя не сделал, и достоверно зная о возложенных на него обязательствах, продолжал не выплачивать алименты на содержание несовершеннолетних детей. Межрайонной прокуратурой данное уголовное дело направлено в Ахтынский межрайонный суд для рассмотрения по существу.

Проверено соблюдение законодательства в сфере энергоснабжения

Межрайонной прокуратурой проведена проверка по обращению гражданина А. по вопросу ненадлежащего энергоснабжения по одной улице в с. Ахты Ахтынского района РД. В ходе проверки

с привлечением работников Ахтынского РЭС установлено, что по ул. С. Стальского в с. Ахты Ахтынского района РД у различных абонентов напряжение в сети составило 160-170 В, что не соответствует нормативному уровню предоставления коммунальных услуг населению (п. 31 Правил предоставления коммунальных

услуг населению, утвержденных постановлением Правительства РФ от 06.05.2011 № 254).

Улица С. Стальского с. Ахты Ахтынского района РД запитана от трансформатора 400 кВА, к трансформатору подключены 137 абонентов. Основной причиной слабого напряжения является протяженность улицы, протяженность воздушных линий 0,4 кВ составляет около 1 км. Указанные воздушные линии изношены, провода имеют разный диаметр сечения, это влечет несоответствие провода нагрузкам. Для

устранения нарушений необходимо заменить провода воздушных линий, при необходимости установить дополнительный трансформатор.

По результатам проверки в адрес директора ПАО «Россети Северный Кавказ» «Дагэнерго» (через прокуратуру РД) внесено представление об устранении нарушений законодательства в сфере электроснабжения, которое находится в стадии рассмотрения.

Ахтынская межрайонная прокуратура

Извещение о проведении собрания по согласованию местоположения границы земельного участка

Кадастровым инженером Гаджимагомедовым Магомедом Ахмедпашаевичем, адрес электронной почты - mferdoki@mail.ru, контактный телефон: +78722553787, № регистрации в государственном реестре лиц осуществляющих кадастровую деятельность - НПО01942, выполняются кадастровые работы в отношении земельного участка с кадастровым номером 05:22:000001:12226, расположенного по адресу: Республика Дагестан, Ахтынский район, с.Ахты, ул. Казин-Магомеда Агасиева, д.4а. Заказчиком ка-

дастровых работ является А.А. Магомедов.

Собрание заинтересованных лиц по поводу согласования местоположения границ состоит по адресу: с.Ахты, ул. Байрамова, 2, МФЦ, в 10 ч.00 мин. 07 июля 2025г. С проектом межевого плана земельного участка можно ознакомиться по адресу: с.Ахты, ул. Байрамова, 2, МФЦ.

Требования о проведении согласования местоположения границ земельных участков на местности принимаются с 04 июля 2025г. по 07 июля 2025г., обоснованные возражения о ме-

стоположении границ земельных участков после ознакомления с проектом межевого плана принимаются с 04 июля 2025г. по 07 июля 2025г., по адресу: с.Ахты, ул. Байрамова, 2, МФЦ.

При проведении согласования местоположения границ при себе необходимо иметь документ, удостоверяющий личность, а также документы о правах на земельный участок (часть 12 статьи 39, часть 2 статьи 40 Федерального закона от 24 июля 2007г. №221-ФЗ «О кадастровой деятельности»).

Халкъдин мисалар

Шазан валара къуьр амач.
Шехъ тавур аяллиз мам гудач.
ЧIуру хабар фад агакъда.
ЧIураз лезн язава.
ЧIувни вацIув эгечIмир.

ЧIал асиррин гуьзгуй я.
ЧIал рикIин куьлег я.
ЧIал халкъдин девлет я.
ЧIехидан гафар мукъвер я.
ЧIулав калин некни лацу жеда.

Дуст цIун юкъвайни акъуд.
Фан къафун гишинвал я.
Хьел атайла акъул катда.
ЦIийи хуьр цIийи уьмуьр я.
Чирвал мугъман, акъул иеси я.

Газ. Игътият квадармир!

Республикадин агъалийрин квалера газ чкӀунин ва нетижада хьиткьинунар хьунин хаталувал, гъайиф хьи, гьелелиг алатнавач. Газдин тадаракар законсуздаказ, алукъ тавуна ва жува-жуваз галкӀуруни хизан ва кьуншияр хаталувилик кутазва, тагъкимарзава «Газпром межрегионгаз МахачкӀала» ООО-дин информаци-ядин кьуллугъди.



А г ь а л и д и вичи хушуналди кӀандай чкадилай вичин кӀвал газдин сетдик кутун – им неинки закон чӀурун, гъаӀ инсанрин уьмуьр ва хатасузвал бегьем кьурхулу-вилик кутун я. Кьилди кьачуртӀа, ихътин крарик акатзава: кӀвал вичи-вичиз газламишун; вичи-вичиз, пешекардал алукъ тавуна, газдин тадаракарин чкаяр дегишарун, абур масабуралди эвезун ва я ремонт авун; газдин тадаракар авай кӀвалер вичи-вичиз цӀийикӀа туькӀуьр хьувун; газ хьиткьинунин хаталувал авай кӀвалахар таммрун патал талукъ тир ихтиярар ва я лицензияр авачир ксар ва я карханаяр желб авун.

- Эгер вичи-вичиз (ихти-яр авачиз) газдин кьурулуш-рик эчекӀнавай дуьшуьш винел акъудайтӀа, сифтедай а касдин кӀвал газдалди таъминарун акъва-зарда ва тахсиркарвилин гъакьин-дай акт туькӀуьрда. Ахпа кьайда чӀурай касдал ада газ законсуз-даказ ишлемишай вири вахтунай алава гъакьи илитӀа.

- Гьихътин жаза – жермеяр лагъайтӀа, адетдин агъалияр патал

– 10 агъзур манатдилай 15 агъзур манатдал кьван; кьуллугърал алай ксар патал - 30 агъзур манатди-лай 80 агъзур манатдал кьван, я тахъайтӀа, 1-2 йисан вахтуналди пешедай кьакъудун (дисква-лификация); карханаяр, идараяр патал - 100 агъзур манатдилай 200 агъзур манатдал агакъдалди я.

Гъа са вахтунда газдин кьуру-лушдик мад сеферда законсузда-каз эхкӀечӀуни, яни тахсиркарвал тикрар хьувуни уголовный жаваб-дарвилел ва 2 йисан вахтуналди азадвиликай магърум авунал (дустагъунал) гьун мумкин я. Ихтияр авачиз газдик галкӀуруни инсан кьиникьал гъанватӀа, жа-задин вахт 8 йисуз азадвиликай магърум авунал кьван гъафарда.

«Газдин кьуллугъдин векил-диз раӀар ахъая! Газдин компа-нийрин пешекарар тадаракар ахтармишун патал кӀвализ ахъай тийизвай ксар жавабдарвилиз чӀугвазвайди фикирдай акъудмир. «Ахтармишиз завайни жада... Ахлад инай» - агъалийри гузвай ихътин жавабар газдин компа-нийрин кьуллугъчийриз даӀлана ван кьвезва. Им тӀа кӀвале (квар-тирада) яшамиш жезвай ксар,

абурун кьуншияр еке хаталувилик кутазва лагъай чӀал я.

Технический рекъий ахтармиш тавунвай тадаракар кьайдада авачиз хьун мумкин я. Абур иш-лемишун инсанрин уьмуьр хата-лувилик кутазва. Ихтияр авачиз, вичи-вичин кӀвал газламишун ам хьиткьинунин ва я цӀай кьунин хаталувилел гъизва.

Газовикар кӀвалера авай тада-раквив гатӀумар тавунин месӀла акъван хциди хъанва хьи, адак гъатта государство кьаришмиш жадай чкадал атана. Газдин идара-дин кьуллугъчиняр кӀвализ ахъай тавунай 5-10 агъзур манатдин жерме ийидай ихтияр ава. Гъа и кьадар жерме кӀвале авай газдин тадаракрив технический рекъий кьуллугъ авуникай кьил кьакъуду-найни ийида. Закондин бинедаллаз пешекарар кӀвализ ахъай тийизвай ксар газдикай магърумдай ихтияр ава. Эгер кӀвале са касни яшамиш жезвачтӀа ва газ ишлемишзавачтӀа, адан иесиди идакай газдин кьул-лугъдиз хабар гун лазим я – ихътин дуьшуьшда кӀвал газдалди таъми-нарун акъвазарда. ИкӀ газовикар-ни, кӀвалин иесиярни, кьуншияр-ни секин ва архайин жада.

Газ ишлемишзавай ксар патал (и месӀладихъ галаз алакӀалу суалар гун патал) «Газпром межрегионгаз МахачкӀала» ООО-дин Контакт-центр кардик ква: **8-800-200-98-04 (пакаман сятдин 9-далай нянин сятдин 8-далди пулсуздаказ зенг ийиз жада).**

«Газпром межрегионгаз МахачкӀала» ООО-дин пресс-кьуллугъ.

И «цӀуд югъ» гъилияй ахъаймир...



Гьуьрметлу мусурман стхаярни вахар! Чаз зурба дережа авай варз мукъва жезва: тахминан 28-майдиз 1-зуль-гъижжа (гъижрадин 12 лагъай варз) алукъзава. Зульгъижжа араб чӀалал гъаждин сагъиб варз, яни виче гъаж кьиле физвай варз лагъай чӀал я. Ам «кьадагъа алай» кьуд вацракай (ражаб, зуль-кьаъда, зуль-гъижжа, мугъар-рам) сад я. И вацрахъ чӀехи метлеб ва зурба дережа ава. Гъавилияй чакай гъар сад и дуьньядани, Эхиратдани жуваз менфят авай дин-дар крар жезмай кьван гъаф ийиз алахъна кӀанда. Ихътин хъсан мумкинвал гъилияй ахъайна виже кьведач.

Ямин МЕГЪАМЕДОВ, дин-дин алим

Зуль-гъижжа вацран сифте цӀуд йикъан чӀехи дережа (эгъ-мият) Ибн Аббас асгъабдилаь (Аллагъ рази хьурай чпелай кьве-далайни) атанвай гъадисда лагъан-ва: Пайгъамбарди (Аллагъдин са-лаватни салам хьуй вичиз) лагъана (мана): «Авач (йисан) йикъара ийизвай са диндар амални - и йикъара (зуль-гъижжадин сифте 10-йикъа) ийизвай (диндар) амалрилай (сувабдиз) артух тир. Абуру лагъана: «Жигъадни артух тушни?». Ада лагъана: «Жигъадни (сувабдиз) артух туш, анжах а кас квачиз - вич (Аллагъдин рекъе) вичин чан ва мал-девлет эцигна экъечӀай ва (анай) хтун тавур» (Бухарий).

Маса гъадисда лагъанва (мана): «Вири йикъарикай гъа и цӀуд йикъа авур диндар амал Аллагъдиз виридалайни кӀан я...» (Тирмизий). Гъавилияй Шари-атдин алими лугъузва хьи, йисан вири йиферикай виридалайни лайихлубур, суваб пара авайбур Рамазандин вацран эхиримжи цӀуд йиф я, абур «Лайлат-уль-Къадр» авайвилай. Йисан вири йикъарикай виридалайни лай-ихлубур, суваб пара авайбур зульгъижжадин сифте цӀуд югъ я (Арафадин югъ ва Къурбанд суварин йикъар авайвилай)!

Гъаждиз фейибур и цӀуд юкьуз Меккада жада ва гъаждиз тефен-вайбурукай гъар сад вич авай чкада хъсан крар ийиз алахъна кӀанда: сунна сивер хуьз, садакъаяр гуз, Къуръан кӀелиз ва къурбанд гъай-ванар тукӀваз, гъаӀни Арафадин юкьуз сив хуьз. Гъадисда лагъанва (мана): «Арафадин йикъан сив хуьни кьве йисан - алатай ва кьведай йисарин - гунагъар багъ-ишламишда ва ашураъ-йикъан сив хуьни (мугъаррам вацран 10 лагъай югъ) алатай йисан гуна-гъар багъишламишда» (Муслим).

Къурбанд авунин ибадатди-кай авай зурба суваб

Къурбанд суварин ва адан гуь-гъуьналлай пуд юкьуз Аллагъдиз

(Чи газетдин и нумрада диндин пак кхъинар ганва. Гъавилияй ам чиркин чкайрал гадарун кьадагъа я)

ПОДПИСКА

2025-ЙИСАН II-ПАЙ ПАТАЛ

«ЦӀИЙИ ДУЬНЬЯ»

ГАЗЕТ КХЪИЗ БАШЛАМИШНАВА

Ругуд варз патал почтадай газет кхъинин кьимет 313,08 манат, йис патал 626,18 манат я.

Редакциядай ва я киоскдай квевай чи газет, гъа виликдай хъиз 250 манатдай кхъиз жада.

Играми районӀгълияр! Чна квез хайи «ЦӀийи дуьнья» газет кхъиниз эверзава. Икьардин бинедаллаз подпискадин пул редакциядин счетдиз ягъайтӀани жада. Газет кхъин 20-июналди давам жезва.

Чи реквизитар: ИНН - 0504007157 КПП - 050401001 Р/СЧЕТ - 4070181700001000026 Л/СЧЕТ - 2003Ш29490 БИК - 048209001

Зи ватан – Россия!



Майдин эхирра Ахцегърин Идрис Шамхалован тӀварунихъ галай Халкъдин театрди Дагъустан Республикада терроризмдин идеологиядиз аксивал авунин рекъий Агитпрограммайрин Фестивалда иштиракна. Серенжем Дербент шегъерда авай Лезгийрин СтӀал Сулейманан тӀварунихъ галай Госмуздрамтеатрда кьиле фена. Ада Дагъустандин районрай ва шегъеррай тир яратмишунрин коллективар, искусстводиз ва театрди кьимет гузвай-бур кӀватӀна. Ахцегърин театрди тамашачийриз режиссер Къизлер Газалиевади эцигнавай «Дяведин заланвилер» тамаша кьалурна.

Сегънедал Ватандин ЧӀехи дяведин эвел ва фашистрин чапхунчийрихъ галаз женгина советрин халкъдал гьалтай гъаф кьадар четинвилер ва магърумвилер кьалурзава. Театрдин актерри чпин ролар акъван хъсандиз тамамарна хьи, са тамашачини кьайгъусуздаказ амуькнач, ва абур сегънедин устадриз гурлу капар яна. Идахъ галаз санал, коллектив Фестивалдин иштиракчийрин Дипломризни лайихлу хъана.

Исламдин банкдин филиал ачухда

Дагъустанда Оманда авай исламдин ири банкдин филиал ачух хьун мумкин я. И жигъетдай Султанат Оманда мугъманвиле финин сергъятра аваз РД-дин карчивилин ва инвестицийрин рекъий Агентстводин руководитель Гъажимурад Ибрафимов Султанат Оманда исламдин Bank Nizwa тӀвар алай сифте банкдин генди-ректор Халид Жамал Аль Кайедахъ галаз гуьруьшмиш хъана. Исламдин регионра финансламишунин кьайдаяр кардик кутунин рекъий РФ-дин Гьукуматдин кьвалав гвай экспертрин Советдин член Раид Абдурагъманов-вахъ галаз санал Дагпредпринимателвилин руководи-телди партнервилин финансламишун вилик тухунин рекъий Дагъустандин тежриба кьалурна, гъаӀни и мукъвара яратмишнавай «Партнервилин финансламиш-лунин фондунин» кӀвалахдикай суьгъбетна.

«Фонд – им вичи партнервилин финансламишунин хиле кӀвалах кьилиз акъудун патал РФ-дин Центро-банкдин патай лицензия кьачунвай надир инструмент

я. Адакай регионда исламдин банкинг вилик тухунин драйвер хьун лазим я. Банкдин генеральный директорди Дагъустандин ахтармишунриз чӀехи итиж кьалурна ва вич саналди кӀвалахиз гъазур тирди лагъана. Инанмиш я хьи, саналди кӀвалахуни Дагъустандин экономика вилик тухун патал цӀийи мумкинвилер ачухда ва чи ре-гиондиз инвестицияр желбда»,– кьейдна Ибрафимова.

Идахъ галаз санал, Дагъустанда банкдин филиал ачу-хунин рекъий гъаӀни саналди тир проектар кьилиз акъ-удун патал партнервилин финансламишунин фондунин кардик квай лицензия ишлемишунин месӀлаяр веревир-дна. Банк, вичин нубатда, гележегда саналди кӀвалахун патал и кьараррин хсуси проектар РД-дин Гьукуматдиз рекъе тваз гъазур я. ИкӀ кьейднавай банкдихъ ва Оман-дин Центральный банкдихъ галаз санал партнервилин финансламишунин хиле пешекарриз чирвилер гунин ва абурун дережа хкажунин рекъий икьарар хъанва.

ЦӀийи дуьнья (Новый мир)

Учредитель:
Администрация
муниципального района
"Ахтынский район"
Главный редактор
Д.Ш.ШЕРИФАЛИЕВ

Газета перерегистрирована Управлением федеральной службы по надзору в сфере связи, информационных технологий и массовых коммуникаций по РД 22 января 2019 г. Регистрационный номер ПИ № ТУ 05-00401.

Позиция редакции может не совпадать с точкой зрения авторов, которые несут ответственность за достоверность и объективность предоставленных для публикации материалов. Рукописи не рецензируются и не возвращаются. При перепечатке ссылка на «Новый мир» обязательна.

Адрес редакции и издателя:
368730, РД, Ахтынский район,
с. Ахты, ул.Герейханова, д.33.

Телефон главного редактора
8(988)-654-59-49

Электронная почта газеты:
newworld1928@mail.ru

ИНДЕКС 63312
Газета «Новый мир» отпечатана в
ООО «Типография-М» по адресу: г.Дербент,
ул.С.Курбанова, 25. Электронная версия газеты
на сайте www.akhty.ru

По вопросам качества печати обращаться
в типографию ООО «Типография-М»

Время подписания в печать по графику 14.00.
Подписано в печать 14:00
Газета выходит 52 раза в год.

Тираж 1550 экз. Заказ № _____